

Thursday, October 23, 2025

Time - 2:30pm

NATIONAL HIGHWAY BLOCKADE

Mizoram Tipper Association leh Kolasib Joint Action Committee ten tukin atanga Vairengte leh Aizawl inkar kawngpui siamthat nawr nana kawngpui an dan chu a hlawhtling hle a, Kolasib khawchhungah lirthei vei vak hmuh tur a awm manglo a ni.

Kan Correspondent hnen atanga thudawn danin kawngpui siamthat nawr nana kawngpui dan chu tukin atang khan a hlawhtling hle a, lirthei vei vak an awmlah bakah Kolasib paltlanga lirthei kal an awmlo a, Kolasib sumo service pawh vawiin hian an tlan loh bakah sumo counter pawh khar a ni a, zin vei vak hmuh tur an awmlo baw.

Hetihlai hian Kolasib Rengtekawna Kolasib Joint Action Committee duty awm khawm chu Police in an man a, an vaiin mi 14 niin an zinga tel JAC Vice Chairman Pu H. Lalchhanchhuaha chuan kawng tha duh avanga kawngpui dan an rawt chu a hlawhtling hle a ti a, kawng pui tha an neih theih nan na takin an nawr zel dawn tih sawiin mipuiten kawng tha neih an phu tih a sawi a ni.

Pu H. Lalchhanchhuaha chuan hun rei tak chhunga kawng chhia avanga an tawrhna chu a nasa tawh hle a ti a, sawrkar ngenna an zah avanga kawng dan an tum thulh leh an tum lai takin sawrkar atanga vauna an hmu chu an lawm lo hle a ti a, sawrkarin Kolasib District te vau zam mai theiha a ngaih avang leh an nawrh chhan a ngaih pawimawhloh avangin an rilru a na hle a ti a, kawng tha an neih theih nan theihtawp an chhuah dawn tih a sawi baw.



BJP CAMPAIGN FOR DAMPA BY ELECTION

Union Minister Kiren Rijiju chuan Dampa by election lo awm turah, BJP candidate thlan tlin a nih chuan Reiek atanga Lengpui airport lamlian sial rawtna awm chu tih hlawhtlin a nih tur thu a sawi.

He thu hi vawiina Dampa bial chhung, Reiek khua a BJP vantlang inkhawm buatsaih ah sawiin, Sorkar laipua Parliamentary Affairs leh Minority Affairs changtu Union Minister chuan Mizoram chu BJP MLA pahni chauh nei state ni mahse sorkar laipua NDA Sawrkar chuan a enhran loh thu leh inthlanpui lo awm leh turah BJP in sorkarna a chan chuan, Mizoram chu ramchhunga hmasawna lan thamna state a nih theih thu a sawi a, Mizorama a cham chhunga a hnena rawtna thlen tamtak awm tih hlawhtlin chu Dampa by election-a BJP candidate tlin leh tlin lovah thui tak a inngah thu a sawi baw. Pu Rijiju chuan Dampa bial mipuiten MLA inthlan an hmachhawn turah BJP MLA an thlan tling a nih phawt chuan sorkar laipui pawhin Dampa bial mipuite chu a bial pum ang a kawng tinrenga an puih ve tur thu a sawi baw.

He hunah hian Mizoram state BJP President Dr K Beichhua pawhin thusawiin, Dampa bialtu MLA Pu Lalrintluanga Sailo a boral ta chu paw a tih thu leh, a hnathawh sa te chhonzawm turin BJP Party chu an inpeih reng thu a sawi a, By election lo awm turah Dampa bial mipuite chu ngaihtuahna seng tur leh BJP candidate Pu Lalhmingthanga Sailo chu Dampa bial mipuite leh sorkar laipui inzawmna atana leihlawn pawimawh tak a nih thu a sawi.

Palak bialtu MLA Pu K. Hrahmo pawhin thusawiin, Siaha mipuiten Delhi nak zen pawp thei MLA an neih ang chiah a, Delhi nak zen pawp ve thei MLA nei ve turin, Dampa bial mipuite chu a duhsak hle tih sawiin tun dinhmuna Dampa bial hmasawna atana sorkar laipuiin Mamit District tan a cheng vaibelchhe 350 a dah hran pawh, BJP candidate Pu Lalhmingthanga Sailo chu a tling a nih phawt chuan amah ngeiin Delhi tlang atanga a zuk lakchhuah theih tur thu a sawi baw.



CM : CYMA CONFERENCE

Chief Minister Pu Lalduhoma’n hnam dang dan lova Mizoram chhunga awm te hnawhchhuah an duh a ti a, hnamdang hnawhchhuah an duh thu Prime Minister Narendra Modi leh Union Home Minister Amit Shah a sawipui tawh tih a sawi.

He thu hi nizana Central YMA General Conference vawi 75-na Sakawrdaia nghah mek a hmanpuina-ah sawiin Chief Minister chuan Mizote chimral annih loh nan hnamdang hnawhchhuah chu an duh a ti a, dan loa Mizorama lut hnamdang an pun zel thu sawiin Sawrkar laipuia hotute pawh a sawipui tawh a ti a, Mizoten ILP an neih chu British hunlai a ta tawh a siam a nih thu leh India ramin zalenna a neih hnuah pawh he dan hi kenkawh zel a ni tih sawiin, he dan hi Mizote humhimna atana dan pawimawh tak a nih thu a sawi a, dan lova hnam dang Mizoram chhunga awmte chu Branch YMA tin ten zawngchhuak a hnawtchhuak mai turin a chah bawk.

Chief Minister chuan Mizoram sorkarin ILP guidelines thar a siam fel tawh thu sawiin, thuneitu ten hemi hnuaiiah hian an awm hnunah ILP thi leh thi lo pawh awlsam taka an thliarfel theih tawh thu a sawi a, ILP enfiah hna pawh veng tinte a intahtawla fimkhur taka kalpui a pawimawh thu a sawi bawk.



CYMA

Central YMA chuan vawiin khan kum 2025 atanga kum 2027 inkara Central YMA hruaitu tur thlangin President atan Pu R. Lalngheta, Hlimen Branch chu thlan a ni.

Central YMA Inkhawmpui lian Sakardaia neih mekah vawiin khan kum 2025 atanga kum 2027 inkara Central YMA hruaitu tur thlan a ni a, R. Lalngheta hian vote tla 3061 atanga vote 1818 hmuin Vote thi paruk a awm a ni.

R. Lalngheta hi kum 2021 atanga kum 2023 inkarah Central YMA President alo ni tawh a ni.

Central YMA Vice President atan Prof Lalnuntluanga thlan tlin a ni a, vote 2645 ah vote 2260 a hjmu a, vote thi 2 a awm bawk.

Central YMA General Secretary atan Prof Malsawmliana chu thlan a ni a, vote 2107 ah vote 1996 a hmu bawk. Chanchin buatsaih lai hian post dang pawh thlan mek a ni.



PM ON GST

Prime Minister Narendra Modi a’n thla hmasa ni 22 a GST rate thar a tihchhuah chuan mipui te ah hlawk na a thlen mek a, vawiin chuan electronics bungraw hrang hrang a GST rate thar in mipui te a nghawng a neih dan kan tarlang dawn a ni.

GST rate thar chuan electronics bik ah dinhmun hnuaihnnung leh khawsak harsa zawk te tan a kawng awlsam ngaihtuah in, mitinte ban phak leh lei phak tur a kawng awlsam siam sak chu a tum ber a ni. GST rate thar hian Air Conditioner leh TV ah zaa 28 chhiah lak ni thin chu zaa18 a tih hniam a ni. He dan thar hian India mipui te tan phurna siam in mitin in thil lei leh hralh kawng ah ahma aiin hlawkna an chan theih phah dawn a, sum leh pai thawhchhuah pawh atih pun belh beisei a ni.

